

TIBÍAMAN LIGÁRADAN PÁBLO JOUN CORÍNTONA

Abúsuraguni

1 ¹Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucrístu, nabúrűjañoun gárada to jun, jugúra le tñlanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya. ²Resíbi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³Íuti quei Búngiu, le Lúguchibei Wabúreme Jesucrístu! Ligía Wáguchibei le gudémejabubei woun, aráanseñu líña lun líchugun gurásu woun furúmieguarügü óra. ⁴Rúti gurásu woun lídan sun wasúfurirun, lun gíñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun. ⁵Lugúndun ítara quei luweírín wasúfurirun luágu líri Crístu, ítara gíñe werésibirun ában oúnwenbun gurásu lúmagiñe. ⁶Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun gíñe gayára lan jerésibirun gurásu wámagiñe, subúdi jumeíme Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu. ⁷Derégüdati wafíñen juágu luágu jasígiramémeba lan derébuguñu lídan jafíñen, láu sun weírí lan jasúfurirun. Subúsi woun luágu láu sun lan jasúfurirun luágu líri Crístu queísi wasúfurirun, jerésibiruba lan gíñe gurásu lúmagiñe Búngiu queísigubeirügü werésibiruni.

⁸Nidújeñu, buséntiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti oúchawagúni ligía, darí yebe lun méreediwa lan lun wawánduni láu wáni woúngua. Jarítaguatiwa yebe luágu woúweguba lán meja lubáragiñe wáfuridun nígiñe. ⁹Sandíguaadiwa yebe woúngua queísi gürígia ja siadiwaaña lun joúnwen. Wel, lasúseredunbei líra

lun wafúnrendeirun lídaangiñe lun wemenigidun luágu Búngiu le gabáfubei lun lásaaragüdüniña jiláaña, máma lun wawoúgua lan wemenigida. ¹⁰Séfu lumútiwa Búngiu dán buri meja ligía le yaráfa wabeí lun wounwen, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali wemenigi luágu, luágu leséfuramémebadiwa lan, ¹¹ánjawa jíderagua láu jayúmuragun lun Búngiu wawágu. Áni ánjaña ayúmuragua sarágu gürígia wawágu lun Búngiu, sarágubaña íchugutiña eteíngiruni lun Búngiu luágu fuleísei lániwa láu leséfuruníwa.

**Ca lan uágu lasáansiraguei Páblo larítangun
luágu luweíyasun ubúrugin Corínto**

¹²Níjein ában cátei agúndaaragüdütiwa. laríñangun warítangun woun luágu gagáburi wamá ában igáburi jarúmati, furáangu, ya uboúagu, jagánaguatima. Íderagua láadiwa Búngiu láu lareíni lun buídu lan wagáburidun ítara, madúgüntiwa ni cátei láu lichú wáu guánarügü. ¹³Lídan le wabúrújanbei jun tídan wagáradan, úati ni cáta arámudaguati ñi le jásínerun alíja o gunfaráanda. ¹⁴Guetó subúdiraüjadün luágu gayára lan jagúndaaragun wáu quei jumáesturungu, chülú lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanme wéyu le lagíribudagüle Jesucrístu uboúagun.

¹⁵Queísi méja affíne nubeí luágu gúnda jumá wáu queísi láni Crístu apóstolugu jun, jarítaguatina yebe meja nídin aríjaün furúmiñe, lun nagúndaaragüdüñun láu bisída nánün bián weíyaasu— ¹⁶jarítagutiná yebe nachúlaagun aríjaün lídan nuweíyasun Macedónioun, dan jamúga le nagíribudun Macedóniagiñe, ábaya jamúga nachúlaagun aríjaün. Ítara líña jamúga gayára lan jíderagunina lun nasígiruni nuweíyasun Judéoun. ¹⁷Madúgün numúti. ¿Jálügüdaguñañan júngua ca lan ueígiñe madúgün nubálin? ¿Masáminarun numúti funáñan quei lubúdubu dan lé meja naríñagubei jun luágu nadúgübei lan cátei le? ¿Jarítaguatiün luágu ítara níña lan queísi lirájüñü uboú ja aríñagubaña ában cátei áni magúnfuliruntiña láu jerérun? ¹⁸Geféenti Búngiu luágu maríñangun wamá ában cátei jun magúnfulirunga wagía láu. ¹⁹Sun wagía—Silváno, Timotéo, áu—apúrichijatiwa jun luágu Jesucrístu, le Liraú Búngiu. Áni mítaraanti Crístu quei gürígia ja aríñagubaña ában cátei áni magúnfuliruntiña láu jerérun, Crístu, súnwandan ladúgüni le laríñagubei. ²⁰Gúnfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadímurejan luma Búngiu luágu luweírigun, ayúmuragua wagía lun, ába waríñangun “ítaralá” lun warúfuduni wafíñerun luágu ladügúwaba lan lídan líri Jesucrístu. ²¹Búngiu adúgübei lun derégüdagu wamá, wagía júma, lídan wafíñen luágu Jesucrístu, ligía anúadajabaliwa lun wesériwidun lun. ²²Rúlaali Sífiri Sándu wádoun lun larúfuduni luágu lánigu wamá. Sífiri

Sáandu le wádaanbei, ligía queísibei lasúbudiraja le lúnbei werésibiruni queísi lánigu Búngiu. Queísi ítara líña lubeí, ¿gayáraati funásan ítara wamá queísi gürígia ja aríñagubaña ában cátei áni magúnfuliruntiña láu? Siñáti.

²³Mídingidina Corínto aríjaün luágu nuweíyasun ñájoun Macedónioun queí yebe narítaguni lugúndunrügü mabúseerun nan nírudaguagüdünün láu ában ébechuni, geféenti Búngiu luágu líra. Ánjein máma lubeí líña, aráansetina lun noúnabun láu nibágari guánarügü. ²⁴Máma jamúgatia wabúseeruña waríñagun jun. “Nijánba jafíñera”, derégüdaguaadün lídan jafíñen, busénrügütiwa wíderagunün lúntima lagánwoundun jagúndaarun.

2 ¹Ligía mídinya nubeí bisídaün lun nírudaguagüdünün. ²Lugúndun ¿ída lubásan gayára lan jamúga nagúndaarun lárígiñe níchuguni íruni joun gürígia ja agúndaaraguagüdübalina? Siñáti jamúga. ³Ligía nabúrújanbei jun ítara, lun gayára lan jaráanseruni cátei le mégeíbei jídaangua lubáragiñe nachúlürün júmoun, dánme lámuga nachúlürün, mibíjin námuga íruni júmagiñe, jugúya le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga gíñe ugúndani. ⁴Dán meja le nabúrújanbarun gárada tugúya jun, weíriti meja nidíjeri juágu darí lun nayájun lídan le nabúrújabarun. Máma meja lun nírudaguagüdünün nabúrújoun jun ítara, nabúrújanun lun jasúbudiruni luweírin nínsiñejabu jun.

Ferúdun lun lé meja afígounjabei

⁵Le rújalibei íruni láu luríban leménerun, máma rügúñein nun líchiga íruni, rúlumuti gíñe jun lídan ában luwúyeri. Naríñagunbei “lídan ában luwúyeri” lun maweírin lan naweíridaguagüdüni jun. ⁶Abeíchuni lé meja jaríñagubei lídan jadámurin lun líchugúniwa luágu gürígia ligía, buídurügaali. ⁷Guetó, lúnti ferúduna jumáni, ru jugúyame gurásu lun lueí ladúgün sarágu íruni wuríbatí lun. ⁸Ligía nayúmuragunbei jun lúnya jaráfuduni jínsiñejabu lun. ⁹Abúrújatina jun luágu cátei le lun gíñe nasúbudiruni ánjein aráanse jubeí lun jadúgüni le nubeíbei jun. ¹⁰Guetóti, le únti ferúduna jumá furúmieguarügü cátei, ferúduna nubeí gíñe, ánjein gíñe njein lubeí cátei le lúnti ferúduna náni gürígia ligía luágu, ferúduna numúti ligíbugiñe Crístu, jueígiñe. ¹¹Lídan ában cátei líbe líra, mabúseerúntiwa wíchugun lúgaaru lun Máfia lun lanúgün ában gürígia le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítangun Páblo ubúругu Tróas

¹²Dán meja le nachúlürünbei ubúругu Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádigimaridun luágu Wabúreme. ¹³Madárangilaanti narítangun lugúndun madári náni wadúje Títo Tróas lun nagáambun lúma juágu. Ligía nayoúragunbei joun wadújeñu ja Tróasbaña, ába nídín loúbawagun Macedonia lun nadúnragun lúma Títo ñi.

Gáñeitiwa láu lubáfu Crístu

¹⁴Buíti lasálirun sun cátei. Teínqui wamúti Búngiu le anúgübaliwa lídoun sun fulásu, amáhareina wagía lábugiñe lagúmadijan Wábuti Jesucrístu, le súnwandanbei lagáñeiragüdüníwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lirímichúniwa líjeme cupáli. ¹⁵Lugúndun ítara wáña quei cupáli le lágudajabei Crístu lun Búngiu, núdüntiwa láu ugánu luáguti Crístu, le queíbei líjeme cupáli, joun ja lúnbaña jerésibiruni ugánu ligía lun jasálbarun, jáma gíñe ja lúnbaña merésibirun jamáni ugánu ligía lun jeféridirun. ¹⁶Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídaguagüdüti. ¿Cáti gabáfubei lun lasúbudiragüdüni ugánu luáguti Crístu? ¹⁷Wagía le loúnajabei Crístu, gabáfutiwa, ladúga mítaran wamá queísi arúfudajatiña yéetiña jagánagua, ja asáansiragubalin linárün Búngiu quei jabúseerun lun jarfjin cába lan jagáñeira lídaangiñe. Lubáragiñe líra, apúrichija wamúti Lerérün Búngiu quei lubeí, ligíbugiñe Búngiu, wagía queísi loúnajan Búngiu ja lídaanbaña ában lúma Crístu.

Ugánu luáguti iséri darádu

3 ¹Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawóugua? ¿Odi gásu funági warífudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruníwa, o wamúriajan lan gárada júmagiñetu joun ámu mútu, quei jadúga jíbiri mútu? ²Uá, lugúndun jugúya afíñetiña, ítara jíña queísi ában gárada to adímurejatu luágu lubuídun wawádigimaridun jagánagua, ítara jíña quei ában gárada to bürúwañutu tídan wanígi, to gayáraaboun jalíjanun sun gürígia, asúbudiragüdei cátawa lan. ³Ítara jíña queísi ában gárada to labúrújan Crístu guánarügü, to wedéregeruboun, ában gárada jugúya to abúrújouaboun láu lání Búngiu le wínwanbei Espírítu, máma láu tínta, áni tídan janígi ladúgei Espírítu ligía wadágimanu, máma luágu dúbü.

⁴Gayáraati waríñagun luágu buídu lan wesériwidun lun Crístu ladúga wadúgüni jeménigiñu luágu Búngiu lun líchuguni ubáfu woun lídaangiñe Jesucrístu. ⁵Mabáfutiwa lun ni cáta láu wáni woúngua, sun le wayáraabei adúga, lúmagiñe Búngiu liábin. ⁶Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti quei lé meja binádu, lé meja lánina lúrudu bürúwati le lúnbei lagúnfulirúniwa láu, lánina ában ibágari le erésibirúti lúmagiñe Sífiri Sándu. Lúrudu ligía, le lilúrudun Moisés, arúfudarügü lumúti wafígoun ligíbugiñe Búngiu, figou ligía, ouweni lafáyeijabei. Ánjeinti Sífiri Sándu, rúti ibágari joun sun ja ánjabaña lun.

⁷Lilúrudun Moisés le, abúrújouati luágu dúbü. Dan le lerésibirubalin lúrudu ligía lúmagiñe Búngiu lun líchuguni joun Israelítagu, nínñein

ában oúnwenbun larúgounga lúmagiñeti Búngiu ligíbuagu darí lun siñá lán meja jaríaguni gürígia jagía ligíbu Moisés, lugúndun weíriti lámiridun ligíbu. Láu sun líra, ába éñegucheina lan larúgounga ligía murúsun murúsun. Ánjein láu lubeí sarágu uweírigin liábin lúrudu ligía le asíadijabei gürígia lun ouweni, ⁸ ¿weírítimaati luweírigin ugánu le lanúgübei Sífiri Sándu woun luágu Wasálbaragüle! ⁹ Ánjein weíri lubeí luweírigin meja lúrudu le esériwidubei lun larúfuduni wadúnrun ligíbugiñe Búngiu woun, ¿weírítimaati luweírigin ugánu luágu Wasálbaragüle le adúgübalíwa richágua ligíbugiñe Búngiu! ¹⁰ Ni cáta luweírigin lilúrudun Moisés ligíbugiñe luweírigin Wasálbaragüle. ¹¹ Ánjeinti weírigin lubeí meja darádu le lúnbei ladúrarun murúsunrügü dan, weírítimaati luweírigin darádu le lúnbei ladúrarun lun sun dan.

¹² Ladúga njein lan eménigini le wawágu, luágu siñá lan leféridiruni ugánu luáguti Crístu luweírigin, wapúrichijánbei furáangu.

¹³ Madúgüntiwa queí meja Moisés, adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun.

¹⁴ Derétu janígi Israelítagu jagía lun laníchigu lilúrudun Moisés joun, queísigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle. ¹⁵ Chülú lúmoun dan le, dan le jalíjanun líburu buri to labúrújaboun Moisés, darúguatu ában bélu láu jachúgü lueí gunfaráanda jamá. ¹⁶ Ánjeinti dan le lígiruni ában gürígia binádu ligáburi lun leíbugun lúma Crístu, ába tagídarún bélu tugúya lueí. ¹⁷ Wabúreme Crístu, ligía Espíritu le íchugubei ibágari. Láu Espíritu ligía (le méme Sífiri Sándu) wádan, sálbatiwa, máfaagunga wagía lun wagúnfulirun láu lilúrudun Moisés. ¹⁸ Ligía sun lubeí wagía afñetiña luágu Crístu, gidáwaaru bélu lueí wasáminan, subúdi wamúti Crístu furáangu, láu sun luweírigin. Ítara wáña queí ában isúbusein to arúfudubalin luweírigin Wabúreme Crístu, áni láu wasígirun íchigei warítagn luágun, sáansiguagüda lumútiwa láni Espíritu murúsun murúsun lun ítara wamá queí ligía.

4 ¹ Mábुरुjalá lubeíti warúna, lugúndun rúlaali Búngiu wadágimanu le lábun waríajaan, láu lareíni. ² Mayúsuruntiwa ibíbuni lun wafíñeragüdüniña gürígia luágu Crístu, rúwamuti wanágan luágun cátei le adúgübei arámudaguarügü, le nibúsigarídünabei. Masáansiragun wameí Lerérun Búngiu, inárüni rügüñein waríñaga. Ítara líña jasúbudiruni sun gürígia cátawa lan ligíbugiñe Búngiu. ³ Ánjein mafúraangun lubeí werérun luáguti Wasálbaragüle, joún rügüñein ja lúnbaña jeféridirun mafúraangun lan. ⁴ Queí mafíñen jabeí luágu werérun, darúlaali Máfia,

le lubúngiutebei uboú le, jaríjin lun siñá lan larúgoundagüdüni ugánu luáguti Crístu le weírigubei, le liyáwabei Búngiu wínnwanti, jasáminan. ⁵Dan le wapúrichijanbei, máma wawoúgua wapúrichija, luágu Jesucrístu wapúrichija, queísi Wabúreme, waríñagati wawoúgua luágu esériwidutiñarügü lan wagía jun, luágu wínsiñejabu lun Jesúsu. ⁶Lugúndun Búngiu, le méme íchugubalin lámpu siélu lun lagídarúniwa lubúriga, ligía gíñe adúnraaguagüdúbalin lilámpun tídan wanígi, lun gayáraabei lan wasúbudiruni luweírigun Búngiu le waríjibei lídan Jesucrístu.

Abágariduni láu eménigi luágu Búngiu

⁷Larúgounda le wibíjubei luágu luweírigun Búngiu le lídaanbei Crístu, ítara líña quei ában irísini woun. Barú wamuti irísini ligía lídan fugiábu wágubu, le ítaraabei quei ában soúdiere, lun larijíníwa luágu lúmagiñe lan Búngiu liábin oúnwenbun ubáfu le wawágubei, máma wámagiñe. ⁸Ítara, láu sun sífuri wamá sun luwúyeri lénreengúnga, súnwandan larúfudun Búngiu ában úma woun lun wáfuridun lídaangiñe furúmieguarügü lénreengúnga. Níjein dan, weíríti wadíjeri luágu cába lan wadúga, máburujaanti warúna, lugúndun íderagua lániwa Búngiu. ⁹Eíbaajoúatiwa, mígirun lumútiwa Búngiu joun wáganiñu. Gayáraati jájuchuruníwa, ígira jamáwa múarugu quei jiláaña, siñáti jagúmuchaguagüdúniwa. ¹⁰Le ñflumuti woúdin, buséntiña wáganiñu jáfaraguníwa jilágubei quei jáfaruni láganiñu Jesúsu jilágubei. Lúnti ítara lúba lan lun gayáraabei lan larijíníwa lubáfu Crístu le wínnwanbei wádaangiñe. ¹¹Wagía, sun awánja lan abágarida, yaráfañu wáña lun woúnwen furúmieguarügü wéyu lueígiñe Jesúsu, lun gayára lan larijíníwa libágari Jesúsu wádaangiñe. ¹²Ítara líña lubeíti, láu yaráfañu wamá lun oúweni lun wíchuguni ugánu jun luágu Wasálbaragüle, resíbi jumúti ibágari magúmuchaditi.

¹³Laríñajare David tídan Lerérün Búngiu. “Affíñetina, ligía nadímurejánbei”, ítara giñéti affíñetiwa luágu Búngiu láu méme ligáburi affíñeni le meja luágubei David. Ligía wapúrichijánbei luágu. ¹⁴Lugúndun subúdi wamúti luágu Búngiu lan le ásaaragüdúbalin Jesúsu lídaangiñe oúweni, lásaaragüdúbalíwa lan gíñe lúnya wabágaridun, úara lúma Jesúsu, ábame lanúgüniwa úara júma ligíbugiñoun. ¹⁵Luágu jáni fuleísei nasúfurirei sun cátei lun gayára lan jagíbedun ja ánjarubaña lun lareíni Búngiu joun, gíbe jamámuga gíñe íchugutiña eteíngiruni lun luágu lareíni. Ítara lúba íñurúañu lan líri Búngiu.

¹⁶Ligía máburujan lubeí warúna. Oúwedeina líña wágubu murúsun murúsun, wawáni, tedérebuguduña ságü wéyu. ¹⁷Ni cáta le wasúfurirubei lídan ibágari le, lídan le wasáminarun luágu oúnwenbun ugúndani le lúnbei wibíjini yágüta siélu dánme le ñi wamá lúma Crístu lídan luweírigun. Mawérinti lidáani wasúfurirun woun ya uboúagu dan le wasáminarun luágu lúntibei lan dan magúmuchaditi wagúndan siélu. ¹⁸Marítaguntiwa sarágu luágu cátei lánina uboú le, ladúga murúsuraü

lan dan ladúrarun. Le uágubei wíchigei warítangun, luágu cátei lánina siélu, ladúga cátei ligía, lúnbei sun dan ladúrarun.

5 ¹Subúdi wamúti lubeíti luágu gayára lan woúnwen lubáragiñe lagíribudun Jesucrístu uboúagun, gayáraati loúnwen wágubu quei teíguadun ában múna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan. Ugubume ligía, mámabei lánina uboú quei ában múna adügútu láu újabu, ábanbei úgubu lánina siélu. ²Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu. ³Láume iséri úgubu ligía wawágu, mítaranbádiwa quei uwáni to úati úgubu táu. ⁴Sun awánja lan abágarida láu úgubu le wawágubei, darítiwa mégeiti luágu, sandígua wagía woúngua láu idíjeri. Máma jamúga wabúseeruña woúnwen lun weréderun quei uwáni úouga úgubu táu, le wabúseerubei, lun lasáansiragun wágubu le gagúmuchadibei furése furése lídoun wágubu le magúmuchadibei, moúnwenga wagía. ⁵Búngiu aráanserubaliwa lun gabágari wamá le magúmuchaditi, áni rúlaali Sífiri Sándu woun queísi larúfudajan luágu ítara lúba lan.

⁶Gúndaatiwa lubeíti súnwandan, láu sun subúdi wamá luágu sun lan awánjagua lan uboúagu abágarida lídan wágubu, boúgudiñadiwa lan tueí wában yágüta siélu, máma lan lúmañadiwa Wabúreme. ⁷Ya uboúagu, siñáti waríjini Crístu, gayáaarügüti wafíñerun luágu. ⁸Gúndaatiwa láu furúmieguaügü cátei le gádaanbaliwa, láu sun jamúga jímein wamáni lun wígiruni ibágari le ya uboúagu lun woúdin agánawa lúma Wabúreme Jesucrístu siélu. ⁹Ligía wáfaagunbei lun wadúgüni lugúndan Wabúreme súnwandan, ya wagía yebe uboúagu, yágüta wagía yebe siélu. ¹⁰Lugúndun sun wagía, waráramuba ligíbugiñe Crístu lun werésibiruni cáda ában le lúnbei werésibiruni, según buíti o wuríbati lé meja wadúgübei dán meja le uboúagugidiwa.

Ugánu lánina darángilau

¹¹Ligía, quei subúdi wabálin lanúfudewa lueí lagúseragüdüin Wabúreme, áfaaguatiwa lun wafíñeragüdüniña sun gürígia. Subúdi láali Búngiu cátawa lan, áni agúrabatina lun gíñe subúdi jumáni. ¹²Máma wadímurejañaya buídu wawoúgua, wíchuguña ában cháansi jun lun jasándiragun júngua gúndaañu wáu, lun gayára lan jóunabuniña arúfudajatiña jagánagua ja apántajabaña luágu lubuídun jarúfudagun jóungua boúgudi jabíti, áni tidan janígi mabuíduñtiña. ¹³Ánjein weíri lubeí wesériwidun lun Búngiu darí lun warijín camá lúlüñein wáu, ladúga luweírin wínsiñejabu lun Búngiu lasúsereda. Ánjein genége lubálin luágu wesériwiduñña lan lun Búngiu láu ában lidíli ichúgü, ladúga luweírin wínsiñejabu jun wadúgei. ¹⁴Mósu nesériwidun lun Crístu táu sun nanígi lárigiñe larúfuduni luweírin línsiñejabu woun láu

loúnwen lídan wafúlasun súnɡubei. Queísigubeirügü jamúga jilá jamá sun gürígia úara lúma dán meja le loúnwenbei. ¹⁵Jiláti Crístu jawágu súnɡubei, lun sun lan ja ánjabaña lun jerésibiruni ibágari lídaangiñe, mámaali lámuga joun guánarügü jabágarida, lun jabágaridun lun Crístu le ouwebei jawágu, sará ligía lídaangiñe ouweni. ¹⁶Ligía manúgün wabeí ni ában quei janúgün lirájünü ubou gürígia, según bougudi jabíti. Luágu méja ában dan, barü wamuti meja Crístu quei janúgüni lirájünü ubou, mítaranjaali guetó. ¹⁷Le lubeíti lídaanbei ában lúma Crístu, ábanjali gürígia iséri, gumúja sun cátei le lánina binádu ligáburí, labágariduña ában iséri ibágari lúma Crístu.

¹⁸Adúga lumúti Búngiu sun cátei le. Gáganiguatiwa meja lúma ladúga wafígoun, ába loúnajani Crístu lun lachíbuni wafígoun, gayára lámuga gamádagua wamá luma. Rúlumuti wadágimanu ligía woun lun waráandaragüdüniña sun gürígia lúma. ¹⁹Le naríñagubei, láu loúnwen Crístu lídan wafúlasun, arúfudati Búngiu ában úma woun lun gayára lan lagídarúniwa wadúnrun luágu wafígoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun gürígia. ²⁰Wayábiña lubeíti queísi wügúriña ja loúnajabaña Crístu, queísigubeirügü jamúga layúmuragun Búngiu guánarügü jun wádaangiñe. Ayúmuraguatiwa lubeíti jun lueígiñe loubadina Crístu. aráandara jumá lúma Búngiu. ²¹Madúgünti Crístu ni ában figou, rúlumuti Búngiu sun lidúnrun wafígoun luágun Crístu lun láu lan lídan wamá ában lúma, lun wachúlürün abágaridei ibágari lánina ísuruni le labúseerubei Búngiu lun wabágaridun.

6 ¹Wagía, queísi ñadágimeintiña úara lúma Búngiu, ayúmuraguatiwa jun lun jarúfuduni láu lubuídun jigáburí luágu máma lan luágu ni cáta jerésibirei lareíni Búngiu jun. ²Laríñajare Búngiu tídan Lerérün.

Nagáambubei bagúajan nun lídan nidáani lun fuleíseijabu nan joun gürígia,

níderagubadibu lídan nuwéyuri lun nasálbarun gürígia.

Chúlújali lidáani Búngiu lun fuleíseijabu lan joun gürígia, niján buri wéyu le luwéyuribei Búngiu lun lasálbaruniña gürígia.

³Áfaaguatiwa lun úaragua lan wagáburí lúma wapúrichijan, lueí jamúga jeréderúniwa gürígia lueí jagáambuníwa. Mabúseerúntiwa jamúga wanúgün minébesei lun luwádigimari Búngiu láu wagáburí, ⁴busénrügütiwa warúfuduni lídan sun cátei luágu esériwidutiña lan lun Búngiu wagía, láu luweírin wagúraasun lun wawánduni asúfuriruni, mégei, lúma lénreengúnga. ⁵Beíjamaadíwa, dáüjamáwa, íchajouátiña gürígia lun jeíbaajaniwa, jéreti wawádigimari lun Búngiu darí lun wasándirun oúnwenbun lubúcha uágu. Reídejadiwa marúmugunga, áfaaga wagía ilámaü. ⁶Arúfuda wamúti gíñe luágu esériwidutiña lan lun Búngiu wagía láu larúman wabágari, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wádaanbei, láu wínsiñejabu le tímatimaati, ⁷láu wáni

ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídun ibágari, dándu lun woúdin jabároun wáganiñu quei lun waráramuniña dan le jayábin wabároun. ⁸Níjein dan ibíjatiwa inébesi, níjein dan anábawaguatiwa. Níjein dan adímurejóuati buídu wawágu, níjein dan adímurejóuati wuríbati. Níjein dan, oúsera jamútiwa quei yéetiña, níjein dan quei wügúriña ja aríñagutiña inárüni. ⁹Níjein dan, oúsera jamútiwa quei ibídiñewatiña, níjein dan quei subúdiwatiña buídu, níjein dan, agúrabañu wáña lan woúnwen, awánjagua wíwanlu, ígirati Búngiu lun wasúfurirun, lun wafúnrendeirun lídaangiñe, ¹⁰moúnwentiwa lídaangiñe asúfuriruni ligía. Láu sun níjein lan cátei lun lírudaguagüdüniwa, níjein gíñe ugúndani kúmagiñe Búngiu títan wanígi. Láu sun gudéme wamá según uboú, aríñagatiwa joun gürígia luágu irisini inárüni le gayáraabei jadáriruni lídan Jesucrístu, láu sun úa lan ni cáta wáma según jarítangun lánigu uboú, ibíja wamúti sun cátei lídaangiñe Crístu.

¹¹Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírin jínsiñe nun. ¹²Masáansiragúnti wínsiñejabu jun, láu sun affíñetina luágu sáansigua lan jínsiñejabu woun. ¹³Ayúmuraguatina jun quei layúmuragun ában úguchili joun lirájüñü lun jínsiñejabu jumá woun le gumúti, queísi wínsiñejabu jun.

Aganoúati Búngiu wádan

¹⁴Magámarida jumá gürígia ja maffíñetiña luágu Crístu, lugúndun janúgüba ában ibágari le múaraanti. Mamádaguati ísuruni lúma wuríbani, siñáti gíñe gamádagua lan larúgounga lúma lubúriga. ¹⁵Siñáti níjein lan úarani lídan Crístu lúma Máfia, siñáti gíñe lúaradun ában affíñeti luágu Crístu lúma ában le maffíñeti. ¹⁶Siñáti gadúnama jamá sándu títan lúban Búngiu, áni lúban Búngiu le wíwanbei wagía, quei laríñangun Búngiu guánarügü.

Naganoúba jagánagua, eíbuga áume jagánagua,
áuba Jabúngiute, jagíame nánigu.

¹⁷Ligía gíñe laríñangunbei Wabúreme Búngiu.

Furíjuma jagánaguagiñe ja maffíñebaña nuágu, díse jumá jaweí, líña Jabúreme.

Mádaragua jumá júngua lídoun le wíyebei.

Ábame nerésibirunün,

¹⁸ábame ában nan úguchili jun,

jugúyame nirájüñü, líña laríñangun Jabúreme, le Súnti Gabáfu.

7 ¹Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbuni sun luwúyeri iwíyeni wawáriua, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladúga luweírin inébesi le wawágubei lun Búngiu.

Lasáansiragun jagáburi Coríntona

²JRújuma ában ubáraü woun tídan janígi! Madúgüngidiwa dáñu lun ni ában, maríbadagüdün wagía ni ában, mayéedagun. ³Máma naríñaguñein le lun níchugun jidúnrun, lugúndun queí buga naríñaguni jun, tídaañadün nanígi, lídaañadiwa ában ínsiñejabúni le mébejati, lídan yebe ibágari o lídan yebe ouweni. ⁴Weíriti nafínen lúma nugúndan jáu, labádinagua sun le nasúfurirubei, sandítina dűgűdaguaü, áni buin nía gíñe láu ugúndani, jueígiñe.

⁵Lúmagiñe meja wachűlűrűn Macedónioun, meméraagűngidiwa, darírugűtiwa lénreengűga lídan sun fulásu geyégua wáu, geyégua ti wuríbu wáu, weíriti wadíjeridun juágu. ⁶Ánjeinti Bűngiu, le íchugubei gurásu joun ja magúraasunbaña, ába líchugun gurásu woun láu lachűlűrűn Tító, ⁷áni mámarűgű láu lachűlűrűn, lugúndun gíñe gagúraasun lan juágu. Aríñagati woun luágu luweírin jabúseerun jaríjiniwa, abájűdagua ligía woun luágu íruni le juágubei luágu le asúseredubei lúma luágu luweírin jabúseerun lun joúdin láu nerérun jun. Ábatima nagűndaarun láu líra.

⁸Láu sun jírugua jumá tadűga gárada to nabűrűjaboun jun, maságűrijaantina luágu, guetó. Aságűrijatiná meja furűmiñe láu nasűbudiruni luágu jírugua jumá tadűga gárada tugűya luágu murűsun dan. ⁹Guetó gűndaatina, máma ladűga jírudagun, ladűga sáansiguagűda láni írudaguni ligía jigáburi. Áfaga juműti íruni ligía lídan ában igáburi le áubei lagűndaara Bűngiu, itara líña lubeíti madűgűntiwa ni murűsun dáñu jun. ¹⁰Lugúndun dan le wíchugun ũma lun Bűngiu lun layűsuruni íruni le wawágubei ladűga luríban wagáburi lun lasáansiraguni wagáburi, barű luműtiwa lídoun asálbaruni le magűmuchaditi, maríbaanti íruni ligía woun. Ánjein wanűga íruni ligía queísi janűgűni lirájűñű ubou, magáraragunga wagía lun Bűngiu, lanűgűbadiwa lídoun féri di lun sun dan. ¹¹Awánda juműti íruni queísi labúseeruni Bűngiu, áni jaríja jumeíti le asúseredubei guetó lídaangiñe jawánduni íruni ligía! Tadűga gárada tugűya, ába jatátirun asáminara buídu cába lan jadűga láu wűgűri le afigounjabei jagánagua. Arűfuda juműti luágu magúndan jumá láu figou le ladűgűbei, áni gánitűn luágu busíganu le líchugubei jun, janűfudetűn lueí jamuga jabeichűniwa lueígiñe. Ába jabúseerun jaríjinina lun nasűbudiruni jínsiñejabu nun. Weíriti jabúseerun lun jadűgűni le richábei, lun jabeíchuni le adűgűbalin figou, adűga jumáli sun le lűnbei jadűgűni lun jaráanseruni cátei le. Madűnrunjadűn guetó. ¹²Dan lubeíti le nabűrűjanbarun meja gárada tugűra jun, mámadiğűya jaműga ladűga nasáminaruña lan sarágu luágu gűrgía le adűgűbalin wuríbani, ni luágu le asűfurirubalin lueígiñe, nabűrűjanbarun lun geféen júma ligíbugiñe Bűngiu luágu luweírin jínsiñejabu woun. ¹³Ligía ragűguaadiwa lubeí woűngua.

Lánwoun sun gurásu le barű wamáalibei juágu, ouñwenbun wagúndan láu waríjini luágu gűnda lan Tító, íderagua jumáli sun jugűya lun

lasándirun darángilaï. ¹⁴Adímurejatina bugája buíti juágu lun Títo, áni gúnfuli jumúti nerérun juágu. Quei sun lan le aríñaga wamáalibei jun, inárüni, ítara líña gíñe inárüni lan le waríñagubei lun Títo, luágu gunda wamá jáu. ¹⁵Áni weíritimaati jínsiñe lun dan le larítangun luágu jadúgüni sun jugúya le lamúriajabei júma, lúma luágu jerésibiruni láu ában inébesei lúma idíjeri lueí jamúga jemégeiruba lan lídan jagúnfulirun láu lerérun. ¹⁶Gúndaatina láu gayára lan nafiñerun juágu le gumúti.

Wíchugun joun gudémetiña

8 ¹Guetó, nidújeñu, buséntina nabájüdagun jun luágu lareíni Búngiu joun tílana sun ligílisi buri to loúbawaguboun Macedónia. ²Láu sun ában lan oúnwenbun oúchawaguni lun jafíñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga rísitiña. ³Geféentina luágu rújamaali lan sun le jayáraabei láu sun tarúman janígi, ru jagía sügú láu lé yebe jayáraabei. ⁴Ayúmuraguatiña sarágu woun lun wígiruniña lun jíchuguni jafáran lídan jíderawagúniwa idújeñu lueígiñe Jesucrístu. ⁵Adúgatiña sügú láu lé yebe wagúrabubei jadúgün, furúmiñe, ába jedéregeragun joúngua le gumúti lun Wabúreme Jesucrístu, lárigiñe ába jedéregeragun joúngua woun, queísi lugúndan Búngiu. ⁶Weíriti jabúseerun jíchugun, darí lun wayúmuragun lun Títo lun lagíribudun júmoun lun gayáraabei lan lagúmuchaguagüdüni labúdajoún seínsu lé meja lagúmeserubei jídan. ⁷Jugúya ubáraübei lídan sun cátei—lídan jaffínen, lídan jisúbudin luágu Lerérun Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan ínsiñejabuni woun—lúnti lubeíti gíñe ubáraü jumá lídan ídejani le.

⁸Máma naríñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáraabei lan gíñe jarúfuduni jínsiñejabu láu jíchugun táu sun janígi quei jagía. ⁹Jarítagua jumá luágu lareíni Wabúreme Jesucrístu woun. rísiti bugája dan le siélu lan, ába lagúdemedun láu liábin ubouágun ladúga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰Luágu jáni fuleísei naríñagei narítangun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adúga jumúti gíñe táu sun janígi. ¹¹Guetó lubeíti, ítara méme jumá darí jagúmuchuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le júmati. ¹²Lugúndun ánjein íchiga ában gürígia sun le liyáraati según le lúmabei, láu sun lugúndan, gúndaati Búngiu láu, áni resíbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³Máma lun jáfagun mégei ladúga jíderagun ámu, ¹⁴le busénwabei, lun ñi lan úarani jídan. Guetó, níjein júma lun jabuínchagüdüni le

jemégeirubei ámu, lídaanme ámu dan, níjeinbei jáma lun jabuínchagüdüni le jemégeirubei. Ítara lúba ñi lan úarani, ¹⁵quei taríñagun Lerérün Búngiu. “Le gíbebei úma, mígiragunti lúma, le míbebei úma, memégeirunti lun.”

Títo jáma líbirigu

¹⁶Teínqui numúti Búngiu luágu líchuguni ayúmajani méme le líchugubei nídoun tídoun lanígi Títo lun líderagunün. ¹⁷Gúndaati Títo lúnya lídin aríjaün quei namúriajani lúma, áni afíñetina luágu weíri lan labúseerun lúnya laríjinün darí jamúga lun lídin láu láni lúngua maríñagunga áu ni cáta lun.

¹⁸Úara lúma Títo, woúnajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúruchagun ugánu luágu Wasálbaragüle. ¹⁹Áni mámarügü líra, anúadaja jamúti gíñe tílana buri ligílisi idújei ligía lun ladügün weíyaasu wáma lun líderagun lídan loúndarún seínsu le. Wadügüñein wadágimanu le, le lánina ídejani, lun wíchugun ugúndani lun Búngiu, lun gíñe warúfuduni luágu busén jamá afíñetiña lun jíderaguniña jadújeñu ja gudémebaña. ²⁰Waráanserüñein sun cátei lébei lun míchugun wamá lúgaaru lun ladímurejoún wuríba wawágu lueígiñe loúndarun seínsu le wadügübei. ²¹Wáfaaguña lun wadügüni sun cátei láu arúmani, mámarügü ligíbugiñe Wabúreme, jagíbugiñe gíñe gürígia.

²²Woúnajaña gíñe ábanya jádaangiñe wadújeñu lúma Títo lúma le ában. Wügüri le, arúfuda láalibei luweírin labúseerun lesériwidun lun Crístu woun lídan sarágu luwúyeri, guetótima láu oúnwenbun affñeni le luágubei luágu jíchuguba lan sarágu seínsu láu sun jugúndan. ²³Le álügüdajati libügürü Títo, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügüdaja jabügürü biáma idújeñu lueígiñe Jesucrístu ja lúmabaña, jaríñagame joun luágu joúnajan lan tílana ligílisi buri, luágu jiñúrágüdüñein lan líri Crístu láu lubuídun jagáburi. ²⁴Ítara líña lubeíti, resíbi jumáña láu ában ínsiñeni le tímatimaati lun gayáraabei lan jaríjini wügüriña jagía luágu inárüni lan lubuídun werérün juágu, áni lun gíñe jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügüriña jagía.

Loúndarún seínsu joun idújeñu ja gudémebaña

9 ¹Luágu loúndarún seínsu joun idújeñu lídan afíñeni, memégeirunwati lun nabúrújan jun, ²lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügújalibei, áni jíbe-ágei Macedóniana ragújaña gíñe dúgüdaguü láu jagáambun luágu luweírin jáfaagun luágu ídejani le. ³Láu sun líra, nouñajaña idújeñu jun nubáragiñe lun jaráanseruni luáguti labúdajoún

seínsu, lun mámabei lan iyéeni, buíti le naríñagubei juágu libúgürü cátei le, lun abúdajouáli lan sun seínsu lubáragiñe nachúllürün jumóun, ⁴ñúdüdügü jañeín jádaangiñe Macedóniana núma, jadárirauñme maráanserunga. Líchuguña jamúga líra busíganu woun, júntima, lárigiñe rúwamaali lan sarágu wafíñen juágu. ⁵Ligía narítangunbei namúriajan jáma idújeñu ja lun jóudin bisídaun nubáragiñe, lun gíñe jíderagunün abuíñchagüdei seínsu le uágubei jaríñaga jóundarun. Ítara, aráanseñu lúba seínsu le jóundarubei lun jarúfuduni jareíni, máma quei ában cátei le lúnti wafósurunün luágu.

⁶Jarítagua jumá luágu cátei le. Le louíguati lábunagun, louíguabei gíñe lalúbajan, le gíbeti lábunagun, gíbebei gíñe lalúbajan. ⁷Cáda ában jídaangiñe, lúnti líchugun queísi ligáburi larítangun, máma láu magúndani ni ladúga aríñawagúa lan jun lun jíchugun, lugúndun jínsiñejabuti Búngiu lun le íchugubei láu ugúndani. ⁸Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligame gíñe sarágu júma lun jídejan. ⁹Taríñajare Lerérun Búngiu luágu gürígia le íchugubei sarágu.

Rújali sarágu joun gudémetiña,

áni reídeiti cátei buíti le ladúgubei lun sun dan.

¹⁰Búngiu, le íchugubalin ílaü lun lábunún, ában lalúbajagüdüñ sarágu lídaangiñe lun gayára lan weígin buídu, líchuguba gíñe jun lun gayáraabei lan jedéweejan sarágu joun gudémetiña queísigubeirügü ílaü le ábunúbei. Ábame laweíridagüdüni Búngiu murúsun fuleísei le jadúgubei joun, daríme lun jabíjin oúnwenbun abíniruni lúmangiñe Búngiu queísi ában oúnwenbun alúbajani. ¹¹Jugúya, jibíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei jóunajani joun wáma, weíribei jateíngiruni Búngiu. ¹²Lugúndun láu wíchuguni íderawaguni le joun wadújeñu, máma wíchiga rügúñein seínsu le jemégeirun joun, wadúgiña gíñe lun jíchugun sarágu eteíngiruni lun Búngiu láu líra. ¹³Jíchuguba uweíriguni lun Búngiu lugúndun arúfuda lumúti ídejani le joun luágu adúga jumáni le lubeíbei Crístu, jíchuguba gíñe uweíriguni lun Búngiu luágu íderawaguni le jíchugubei joun lúma joun súngebui. ¹⁴Ábame jayúmuragun lun Búngiu juágu láu sarágu ínsiñejabuni jun luágu luweírin lareíni Búngiu le larúfudubei jídaangiñe. ¹⁵Teíñqui wáña lun Búngiu, luágu rújali lan ában oúnwenbun cátei woun le siñá wabeí adárra dimúrei le buídurügüti ubuídun lun wadímurejan luágu! Cátei ligía, Liraú.

Lubáfu Páblo queísi apóstolu

10 ¹⁻²Aríñawagúati luágu gudémegu nan dan le júma nan, ánjein lan dan le díse nan jueí, derégüda lan nouuserun júma. Áu Páblo, ayúmuraguatina jun láu ában únabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdüñun luágu wuríbati le jadúgubei, dánme le nachúllürün

júmoun. Sáansi jumeí ligáburi jarítangun wawágu, jugúya le aríñagubei luágu lun lan waríjin cába lan waságara lídaangiñe wesériwidun lun Crístu. Ánjein madúgün jumá, aráansetina lun nagágibudangun júma.

³Inárüni luágu ubouáguna wamá láu sun jadébilin güriquia ubouáguna, máma queísi wügüriña lánina ubou le wawúribuja luágu wurfbani.

⁴Máma ubouáguna áruma to áuboun wawúribuja, larúmate Búngiu wayúsuruboun lun tagúnrinchangun érei. ⁵Ítara líña lubeíti, láu lubáfu Búngiu güriñgua wamúti sun arítangun le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun gñe jasáminan güriquia ubouágu rúwamuti lábugiñoun lubáfu Crístu lun lúaraduba lan láu le lubeíbei. ⁶Áni lárigiñe jíchaagun júngua le gumúti lábugiñoun lagúmadijan Crístu, aráanseñu wáña lun wasúfuriragüdüniña ja magáambadigiñabaña lun.

⁷Barú jumuti cátei quei larijiniwa bougudigiñe libíti. Aríñagatina jun luágu ánjein lan choúruga lubeí ában güriquia lúngua luágu lánigu lan Crístu, lúnti gñe lasúbudiruni luágu ítara méme líña lan lánigu wamá gñe Crístu. ⁸Fágu jarítangun luágu néredun murúsun lueí le lubúdubu luágu nubáfu queísi láni Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdüniñ lídán cátei lánina Búngiu, máma lun nagúnrinchaguni jafñen, queísi jadúgüni arúfudajatiña jagánagua guetó. ⁹Mabúseerúntina lun jarítangun luágu náluguña lan nebélaagüdüñ anúfudei jídoun táu nigáradan. ¹⁰Aríñagatiña náganiñu luágu abúrúja nánun gárada queísi ában güriquia láuti sarágu ubáfu, áni derégüdatí nege nerérun jun tídan, dan le júma nan, débilitiná nege, áni mínsiñegu lán nege ligáburi nadímurejan. ¹¹Furúmieguarügü le aríñagubalin cátei le, lúnti gñe lasúbudiruni luágu ítara lan quei nubeí láu dimúrei díse jueí, ítara núba lan gñe dánme le júma nan.

¹²Míchaaguntiwa woungua jámoun ja adímurejabaña buídu jawougua, mítaraantiwa quei jagía. Jagía, adúgatiña ában libídiouniga áu láu jamísuraagun jóungua láu guánarügü jamísuraagüle lúma láu jíchaagun jóungua jámagua. ¹³Wagía, mapántajaanbadiwa luágu wawádigimaridun lun Búngiu lídán ában fulásu le ñllumuti míchugun lan Búngiu úma woun lun wesériwidun lun ñi, queísi jadúgüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía ánjarubei lun wachúlürün júmoun ubúrugin Corínto. ¹⁴Ligía mídin wabeí sügü láu le labúseerubei Búngiu wadúga lídán le wáfaagun lun wíderaguniñ, ladúga wagía anúgübalin ugánu luáguti Crístu jun furúmiñe. ¹⁵Mapántajaantiwa láu wadágimanu le jadúgübei ámu, camá jamuga wadúga. Agúrabarügütiwa lun quei lan lagánwoundun jafñen, gayáraabei lan wawádigimaritima jagánagua, súnwandan quei lugúndan Búngiu. ¹⁶Lárigiñeme, jarítaguatiwa wadíseduntima lun wapúrichijani ugánu lánina asálbaruni lídán buri fulásu le díseti jueí, le ñí lumuti magáambungiña lan luágu Crístu, lueí wapántajan luágu wadágimanu le jadúgübei ámu, camá jamuga wadúga.

¹⁷Le busénti ladímurejan luágu uweírighuni, ladímureja luágu luweírighun Crístu, máma luágu luweírighun guánariü. ¹⁸Lugúndun gürígia le buídubei, máma le adímurejabei buídu luóúgua, le uágubei buídu lan ladímurejan Wabúreme Crístu, ligía buídubei.

Páblo jáma yéetiña ja aríñagubaña luágu apóstolugu jamá

11 ¹¡Buséntina jamúga lun jawánduni libídiouniga náu murúsun! Awánda jumá, ²lugúndun eméendütina jáu láu ában eméendüni le lúmagiñeti Crístu, lueí jamuga jígiruni Crístu. Áu asúbudiragüdúbalin Crístu jun, ába júaradun lúma, áni le nabúseerúbei, lun gayáraabei lan nedéregerunün lun quei ában irájü jarúmatu to amárieidutu lúma ábanrügü wügüri. ³Ítara quei layéedunun Máfia Éva, janúfudetina lueí gíñe jígiraguagüdün júngua lun jeyeedün lídan jarítangun, lueí jesériwidun lúnrügü Crístu táu sun tarúman janígi. ⁴Naríñagubalin le, ladúga resíbi jumáaña ja núbintiña adímureja iyéeni jun luágu Crístu, áni bulféiguatün lueí cátei inárüiti le warúfudajabei jun. Resíbitün gíñe ában espíritu láu ugúndani ámu lueí Sífiri Sándu le resíbi jumáalibei láu warúfudajan jun, resíbitün gíñe ában ugánu lánina asálbaruni jámagiñe le ámu lueí ugánu lánina asálbaruni le agáamba jumáalibei wámagiñe. ⁵¡Afñetina luágu múnabun nan sügü jáu súper-apóstolugu ja jafálarubaña! ⁶Fágua ibídiouguati láu ligáburi nadímurejan, mabídiounigati láu nisúbudin, áni arúfuda wamáali le jun súnwandan lídan sun le adúga wamáalibei.

⁷¿Ódi wuríbati nadúga napúrichijani ugánu lánina asálbaruni jun magúburajanga áu ni cáta, únabudaguagiüda núngua ítara lun niñúragunün lídaangiñe binádu jigáburi? ⁸Barútina seínsu jámagiñe tílana ámu buri ligílisi láu nerésibiruni le jafáyeirubei nun, lun nayúsurun esériwida jun magúburajanga naün. ⁹Áni dan lé meja níjein lan nemégeirun dan le júma nubeí, merédetina quei ijürügu lun ni ában, idújeñu ja núbínbaña Macedóniagiñe, jagía íchugubalin le nemégeirubei nun. Ítara líña náfaagun lun mámabadina lan ijürügu jun lídan ni cáta, áni ítara méme lúba nadúga. ¹⁰Ítara quei choúru náni luágu subúdi náni linárün Crístu, ítara líña gíñe nasúbudiruni luágu manúgübadina lan seínsu lúmagiñe ni ában lídan sun Acáya, lueí jamuga lagídarúniwa lébuna ugúndani le nuágubei, lun gayára lan nesériwidun jun magúburajanga. ¹¹¿Cásan uágu nadímureja ítara? ¿Ladúga funásan jimísiñe nun? Subúditi luweírin jínsiñe nun lun Búngiu.

¹²Nadúga mémebei le nadúgübei lun míchugun nan lúgaaru joun arúfudajatiña jagía ja álujabaña lun gayáraabei lan jaríñagun luágu ítara méme líña lan jesériwidun jun queísi wagía. ¹³Máma Crístu óunajabaliña yéetiña jagía jagánaguóun láu sun jafámurun camá lánigu Crístu apóstolu jagía. ¹⁴Áni máma cátei terénchati le, lugúndun Máfia guánariügü arúfudaguati lúngua quei ánjeli le íchugubalin larúgounga, ¹⁵ligía giñeti jafámurubei ja esériwidubaña lun queísi gürígia ja adúgütiña buíti. Wel, lachúlürüba wéyu lun jerésibiruni le jadúnabei luágu wuríbani le jadúgübei.

Lasúfurirun Páblo luágu lesériwidun lun Crístu queísi apóstolu

¹⁶Naríñaguñaya jun. Úa la ni ában arítaguti luágu ladúga lan lúlü lan náu nadímurejanbei jun ítara, ánjein jarítagua jubálin ítara, ígira jumána lun nadímurejan jun quei ában lúlü táu, lun gíñe gayára lan napántajan murúsun. ¹⁷Dan le nadímurejan buíti nuouúgua, madímurejaantina láu ában únabuni quei ligáburi ladímurejan Crístu, nadímurejan quei jadímurejan ibídiouguatiña áu. ¹⁸Queísi japántajan arúfudajatiña jagánagua láu buri cátei le lánina uboú le, napántajaba gíñe. ¹⁹¡Quei lanárimebei lichú jáu, awánda jumútiña lúlü táu láu ugúndani! ²⁰Lugúndun awánda jumútiña ja afósurubalün lun jesériwidun joun, jáma gíñe ja aságarubalin le júmati, ja anúgübalün jánime, ja ouserubalün quei ni cáta, ja agáyuajabaña jigíbuagun. ²¹Láu sun nibúsigari nan lun naríñaguni, ¡weírití buga wedébilin lun wadúgüni cátei líra!

Ánjeinti le uágubei gayára lan janáangun joúngua, gayáraati gíñe nanáangun núngua luágu (nadímurejaña méme queísi ában lúlü táu). ²²¿Jarásan Hebreóna jagía? Áu sun. ¿Linásiñuna Israel jagía? Áu sun. ¿Linébaanfaangu Abrahám jagía? Linébaanfan gíñe áu. ²³¿Esériwidutiña lun Crístu jagía? Sügútimaatina jáu láu sun nadímurejaña lan queísi ában lúlü táu dan le naríñaguni. Nádágimeinjaadina sügú jáu, beíwaadina sügú jáu, dáüwaadina sügú jáu, sarágujali weíyaasu yaráfa nan lun noúnwen. ²⁴Seíngüjali weíyaasu jabeíchunina juríu láu darándi-néfu beíti. ²⁵Úrüwa weíyaasu jíchaagun Rómána wéwe nuágu, ában weíyaasu jachúrágun juríu dúbü nuágu. Úrüwa weíyaasu tabúluchun ugúnein to ídaanboun náfayaja náu, ában weíyaasu sügútina ában áriebe lúma ában wéyu anágü baránaja lárigiñe tabúluchun ugúnein náu. ²⁶Aweíyasujaadina sarágu luágu luwádigimari Wabúreme, áni luágu buri weíyaasu ligía daríguaadina núngua lídan pelíguru dúnarugu, jádan jíwerutiña, jádan nupaísanu, lúma jádan teréncha. Daríguaadina núngua lídan pelíguru ubúrugu, áraabu, lúma baránaja, lúma lídan pelíguru jádan güriquia aríñagutiña luágu idújeñu jamá lueígiñe Jesucrístu, le jayéeni. ²⁷Deréti nuwádigimaridun láu sarágu lénreengúnga, reídeíjadina marúmugunga sarágu weíyaasu, súfuríjadina ilámaü lúma mágürabu, ayúnaraadina gíbe, súfuríjadina lidíliga lúma tilouúgua anáanguni.

²⁸Boúgudi lueí buri cátei le lúma buri ámu cátei, ságü wéyu nasándiruni lijírü nidíjeri jawágu tílana sun ligílisi. ²⁹Ánjein débili lubeí ában güriquia, sandítina camá jamuga áu débilibei. Ánjein áburuja ában güriquia lídoun figoú, weíriti nigárigu luágu. ³⁰Ánjein lúnti lubeí napántajan lun gayáraabei lan jerésibirunina queísi apóstolu, napántajaba láu buri cátei le, le arúfudubalin nidébilin. ³¹Búngiu, le Lubúngiute áni Lúguchi Wabúreme Jesucrístu, le únbei lúnti lan líchugúniwa uweíriguni lun sun dan, subúdi lumúti luágu inárüni lan naríñagubei. ³²Dán meja le ubúrugu nubeí Damásko, ába líchugun gumádimati le esériwidubei lun urúei Arétas

oúnigirutiña luágu buri lubéneri fulásu ligía lun janúgünina adáüra. ³³Ába jaráriragüdünina numádagu lídan ában faníñe lídaangiñe ában funédere láni lubárierun ubúrgu, ítara líña neséfurun jájaburugugiñe náganíñu.

Labájüdagun Páblo luágu buri cátei le larúfudubei Jesucrístu lun

12 ¹Magáñeirunti gürígia ni cáta láu ladímurejan buídu luougua. Láu sun líra, nabájüdagua jun guetó luágu buri cátei lé meja larúfudubei Jesúsú nun. ²Catoúrusu irúmu guetó lueígiñe nanügúniwa lídoun lúrwian siélu, áu le afíñebei luágu Crístu. Ibídiñeti nun ánjein láu sun lubeí nógubu nídin, lúmoun máma lan láu, Búngiu asúbudirubalin. ³Subúdi numúti luágu barúwa nan lídoun lúrwian siélu, le méme gíribei paraíso, ibídiñeti nun ánjein láu sun lubeí nógubu o máma lan láu sun nógubu, Búngiu rügúñein asúbudirei. ⁴Ñi siélu, arúfudati Búngiu cátei nun lé buri uágubei siñá lan nadímurejan ni ca un ladúga arámudaguati buri cátei ligía lueí jasúbudin gürígia. ⁵Gayáraati jamúga napántajan luágu naríjini buri cátei líra, láu sun líra, siñáti napántajan nuoúgua, nadímurejanrügü luágu luweírin mabáfu nan nurúmawagua. ⁶Láu sun ánjana lan jamúga busén nadímurejan buídu nuoúgua, máma jamúga libídiouniga áu líra, lugúndun inárüni lan jamúga le naríñagubei luágu le asúseredubei nun. Madúgün nubeí lun úa lan ni ában anügütina weíri sügü láu laríjinina o sügü lan láu le lagáambubei naríñagun.

⁷Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámabei lan lúba, ába líchugun ában sándi nuágu camá jamuga ában jíyu çharúñu nuágu, liábin quei ában lumégen Máfia lun lasúfuriragüdünina. ⁸Úrüwaali weíyaasu namúriajan luma Nabúreme Crístu lun lagídaruni sándi ligía nueí, ⁹laríñaga Nabúreme nun. “Anájein búma láu nínshiñejabu, áni buídurügüti líra lun bawánduni sun asúfuriruni, buítimaati larijín nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu. ¹⁰Ligía nagúndaarúnbei láu débili, anabúni, mégei, eíbaajóuni, luma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weíritimaabei nasándiruni lubáfu Crístu nuágu.

Lidíjeri Páblo jawágu tílana ligílisi Coríntona

¹¹Ábanjadina lúlü táu láu nadímurejan buíti nuoúgua, áni jugúya adúgagüdúbalin nun, lugúndun jugúya yebe lúnbei jadímurejan buídu nuágu, máma áu. Múnabuntina sügü jáu súper-apóstolugu ja jafálarubaña, láu sun ni cáta nan. ¹²Lídan wadágimanu le nadúgübei láu sarágu gurásu jagánagua, arúfudúati láu seíni luma miláguru weíriti le nadúgübei luágu ában lan apóstolu tímatimaati áu. ¹³Móuserun numútün únabu jaweí tílana tíbiri ligílisi, ánjein gubeírügü láu lubeí meréde nan quei ában ijúrúgu jun. ¡Ferúduna jumána luágu líra!

¹⁴Guetó aráanseedina lun nídin bisídaün lúruwan weíyaasu, áni mámabadina ában ijúru gu jun. Mاما náluguñein le júmabei, jugúya nálugubei lun jedéregeragun júngua le gumúti lun Crístu. Ítara jña nun queísi isáanigu, áni agúbúrigu lúnbaña jóundarun seínsu jabá jasáanigu, máma isáanigu jabá agúbúrigu. ¹⁵Nagástarubei le númabei láu ugúndani juágu, daríme lun níchaagun núngua le gumúti luágu jufúleisein lun gayáraabei lan jeíbugun buídu luma Crístu, láu sun genége láni luágu dántima lan le jínsiñe jumá nun, mínsiñetimaatina jun.

¹⁶Añájein, láu sun subúdi jamáni luágu meréde nan quei ában ijúru gu jun, aríñagatiña luágu barú nan seínsu júmagine lídan ámu luwúyeri láu íbíbuni. ¹⁷¿Ayéeda numútün funági láu ában jádaangiñe gürígia ja noúnajabaña jun lun lanúgüni seínsu júmagine nubá? ¹⁸Amúriajatina luma Títo lun lídin bisídaün, oúnaja áu ában idújei luma. ¿Yéegua lumútün funági Títo? ¿Ma ában láu woúserun wagía biángubei, áni ában méme Sífiri Sándu abúgurubalíwa?

¹⁹Fágua jarítaguatün luágu weséfuraguña lan woúngua jigíbugiñe, máma líña. Lubáragiñe líra, wadímmurejaña ligíbugiñe Búngiu queísi lánigu Crístu. Sun le aríñaga wamáalibeí, waríñaguñein lúnrugü jawáanserun lídan jeíbugun luma Búngiu, nidújeñu jínsiñetiña nun. ²⁰Nidíjeritina lueí dan lánme nídin aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgati, luma igáni tídan janígi, láu jáfaagun lun jawáanserun láu júnabudagüdüniña jidújeñu lueígiñe Jesucrístu, láu marásualugu, agúseragüdüña jidújeñu, láu pántaü, luma lídan chagáguatü. ²¹Nidíjeritina lueí lídan lánme nídinya bisídaün, lanúgagüdüniña Nubúngiute busíganu jáu, lueí gíñe nayájun jawágu sarágu jádaangiñe ja affigounjañabaña lúmagine binárü áni mígirun jamágili iwíyei, salúfuri, luma buri ámu luwúyeri wuríbani.

Ewéridijani luma lagúmujoün buri mábugaü

13 ¹Nijánme lúruwan weíyaasu nídin bisídaün. Dánme le nachúlürün júmoun, lagúseragüdüwaba cáda ában le gadúnrunti ánjein añájein lubeí biáma o úruwa geféentiña luágu lidúnrun. ²Luágu meja libíaman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburi. Láu sun díse nan jueí guetó, naríñaguñaya joun sun ja asígirubaña adáagua wuríbani, luágu dánme lan nídin bisídaün lúruwan weíyaasu, nasúfuriragüdübaña lan láu ában érei weíriti. ³Narúfudubeiti jun luágu adímureja lan Crístu nídaangiñe. Áni medébilinti Crístu lídan ligáburi loúserunün, arúfudarügü lumúti luweírin lubáfu jagánagua. ⁴Inárüni luágu jilá lan luágu gurúwa queísi débiliti, ába labágaridun láu lubáfu Búngiu. Débilitiwa gíñe queísi ligía dán meja le laganounbei ya ubouágu, áni quei sará lan Crístu lídaangiñe ouweni láu sun lubáfu Búngiu luágu, wachúlürüba júmoun láu sun lubáfu Búngiu wawágu ladúga lídaañadiwa lan ában luma Crístu.

⁵Jóuchagua jumá júngua lun jaríjini ánjein lánigu jubeí Crístu le tímatimaati, jóuchagua jumá júngua, moúchugua jumána. ¿Ibidiñeti jun luágu njein lan Crístu jídan ánjein afíñe jubeí le tímatimaati luágu? ⁶Agúrabatina jasúbudiruni luágu afíñe wamá luágu Crístu le tímatimaati, áni njein lan agánawa wádan láu sun lubáfu, ⁷ladúga mabúseerun wamá warúfuduni wabáfu quei apóstolugu láu wasúfuriragüdünün luágu luríban jigáburi. Busénrügütiwa lun buídu lan jeíbugun lúma Búngiu láu sun jamúga ígirúa wamá marúfudunga wabáfu quei apóstolugu. ⁸Dan rügüñein múaran lan lagáburidun gürígia lúma linárün Búngiu, labúseerúa larúfudúniwa nubáfu queisi apóstolu lun nasúfuriragüdüni gürígia luágu lifígoun, dan le buídu lan jóúdin lúma Búngiu, mabúseerúnwati narúfuduni nubáfu láu abeíchuni. ⁹Gúndaatina lun naganoún quei mabáfuti ánjein buídu lubeí jigáburi, áni wayúmuraguamémeba lun jiábin lun jabuídurun le gumúti. ¹⁰Nabúrüjañoun gárada to jun lubáragiñe nídín aríjaün, lun gayáraabei lan jasáansiruni jigáburi lubáragiñe nachúlürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdünün. Lugúndun rúlumuti Búngiu ubáfu nun queisi apóstolu lun nawáanseragüdünün lídan jeíbugun lúma, máma lun neréderunün lueí.

¹¹Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburi, ragújuma dúgüdaguaü, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu.

¹²Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua. ¹³Mábuga jáña sun wadújeñu lídan affíneni jun.

¹⁴Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labúrüjan Páblo joun tílana ligílisi buri to Galáciaboun

1 ¹Anája áu Páblo, le láni Jesucrístu apóstolu. Máma güriúa anúadirubalina lun apóstolu nan, máma gíne güriúa óunajabalina apúrichija luágu, Jesucrístu guánarügü lúma Wáguchi Búngiu le ásaaragüdübalin lídaangiñe óuweni, jagía óunajabalina quei apóstolu. ²Áu jáma sun wadújeñu lueígiñe Jesucrístu ja númabaña ya, wabúrújañoun gárada to jun, jugúya le tílana sun ligílisi to Galáciaboun. ³Binílaün Wáguchi Búngiu lúma Wabúreme Jesucrístu, ibíja jumá gíne darángilaiü jámagiñe. ⁴Rúlumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina uboú le, queísi labúseeruni Búngiu. ⁵¡Uweírighuni lun Búngiu lun súnwandan! Ítaralá.

Ában rügüñein luwúyeri ligáburi wasálbarun

⁶¡Weíriti nanígi láu lufúresen jígiruni Búngiu le agúarubei jun lun lánigu jumá luágu le ladúgübei Crístu juágu, láu luweírín línsiñejabu! Furéseti jasáansiruni jaffñerun afálara ámu arúfudajani lún nege jadáriruni jasálbarun lídaangiñe, ⁷iyéeni arúfudajani ligía. Chúlújaña wügúriña jagánaguóun, ja buséntiña jañáwurijani jarítangun lun jafálarun ában úma le maríchatí—ámu lueí jafíñerunrügü luágu Jesucrístu lun jasálbarun. ⁸Wel, furúmieguaügü güriúa le nübinbei adímureja jun luágu ámu luwúyeri asálbaruni lueí le arúfudaja wamáalibei jun, cáteñein lan güriúa ligía, ¡reídeilá lábugiñe líñarangun Búngiu lun sun dan, áu yebe, ában yebe ánjeli siélugiñe! ⁹Aríñaga náali meja áni naríñagayaali guetó. Ánjein nübin ában güriúa arúfudaja ámu luwúyeri ligáburi asálbaruni lídaangiñe figoú jun lueí le resíbi jumáalibei, ¡reídeilá lábugiñe líñarangun Búngiu!

¹⁰Dan le naríñaguni le, ¿náluguña neréderun buídu jagíbugiñe güriúa, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe güriúa? Lun jamúga ligía lan nabúseerúbei, mámaadina jamúga ában esériwiduti lun Crístu.